

BOSNA I HERCEGOVINA
FEDERACIJA BOSNE I HERCEGOVINE
TUZLANSKI KANTON
GRAD ŽIVINICE
GRADONAČELNIK

Broj: 01/2-04-89- 1099/24.

Živinice, 07.06.2024. godine

Na osnovu člana 15. Zakona o principima lokalne samouprave FBiH („Službene novine Federacije BiH“, broj 49/06 i 51/09), člana 38. Statuta Grada Živinice („Službeni glasnik Grada Živinice“, broj: 5/19 i 9/21), člana 23. stav (2) Odluke o utvrđivanju uslova i kriterija za stipendiranje učenika srednjih škola, studenata dodiplomskog studija, učenika i studenata sa invaliditetom i polaznika sa laskim intelektualnim teškoćama i kombinovanim smetnjama, broj: 01/2-04-89-1065/24 od 05.06.2024. godine (u daljem tekstu Odluke), Gradonačelnik objavljuje

J A V N I P O Z I V
za dodjelu stipendija redovnim studentima dodiplomskog studija
za akademsku 2023/24. godinu

Član 1.

Predmet Javnog poziva za dodjelu stipendija redovnim studentima dodiplomskog studija za akademsku 2023/2024. godinu (u daljem tekstu: Javni poziv) je dodjela stipendija **za akademsku 2023/24. godinu** iz Budžeta Grada Živinice za 2024. godinu za redovne studente dodiplomskog studija sa područja Grada Živinice, koji ne primaju stipendiju, kredit ili drugu novčanu nagradu za školovanje od drugog davaoca, **koji su prvi put upisali godinu studija u akademskoj 2023/2024. godini** za koju se dodjeljuje stipendija.

Član 2.

U akademskoj 2023/24. godini dodijelit će se 59 (slovima: pedesetdevet) stipendija studentima dodiplomskog studija ili 35% od ukupno raspoloživih sredstava u Budžetu Grada Živinice za 2024. godinu, za ove namjene.

Stipendije se dodjeljuju studentima dodiplomskog studija u mjesečnom iznosu od 100,00 KM, odnosno 1.000,00 KM za navedenu akademsku godinu.

U slučaju da zbog prijave većeg broja studenata koji se ne boduju koji su uvršteni na rang listu dobitnika stipendije dođe do prelaska iznosa novčanih sredstava koji je planiran budžetskom pozicijom, iznos stipendije iz ovog člana se dodjeljuje studentima koji imaju veću prosječnu ocjenu, a studenti koje treba bodovati, neće biti bodovani, niti uvršteni na rang listu dobitnika stipendije.

Pravo na dodjelu stipendije nemaju studenti koji su imali status studenta – apsoluta u **akademskoj 2023/2024. godini**.

Član 3.

Uslovi za dodjelu stipendija studentima dodiplomskog studija su:

- da imaju mjesto prebivališta na području Grada Živinice,
- da imaju status redovnog studenta dodiplomskog studija **u akademskoj 2023/2024. godini**,

- da su prvi put upisali odgovarajuću godinu studija **u akademskoj 2023/2024. godini**, za koju se dodjeljuje stipendija,
- da ne primaju stipendiju, kredit ili drugu novčanu nagradu za studiranje od drugog davaoca.

Član 4.

Lista dobitnika stipendija za studente dodiplomskog studija koji ispunjavaju uslove iz člana 3. Javnog poziva a koji su definisani članom 9., 10. i 11. Odluke utvrđuje se na osnovu sljedećih kriterija:

1. Učenik generacije koji se prijavljuje kao student prve godine dodiplomskog studija,
2. Učenik koji je završio četverogodišnje srednje obrazovanje i postigao odličan uspjeh iz svih nastavnih predmeta koji se prijavljuje kao student prve godine dodiplomskog studija,
3. Student druge godine dodiplomskog studija koji je u prvoj akademskoj godini ostvario najmanju prosječnu ocjenu 9,0, student treće, četvrte, pete ili šeste godine dodiplomskog studija, koji je u svim prethodnim akademskim godinama ostvario najmanju prosječnu ocjenu 9,0,
4. Uspjeh u učenju od I-IV razreda srednje škole za studente prve godine dodiplomskog studija, a za studente druge, treće, četvrte, pete ili šeste godine dodiplomskog studija uvjerenje sa utvrđenim prosjekom ocjena za predhodnu akademsku godinu (akademska 2022/2023),
5. Materijalni položaj,
6. Socijalni položaj.

Učenici generacije srednje škole i učenici koji su završili četverogodišnje srednje obrazovanje i postigli odličan uspjeh iz svih nastavnih predmeta uvrstavaju se na privremenu i konačnu rang listu studenata, bez bodovanja, kao prvorangirani po abecednom redu ukoliko ih ima više, uz napomenu da se na privremenu i konačnu rang listu uvrstavaju kao učenici generacije ili učenici koji su postigli odličan uspjeh iz svih nastavnih predmeta.

Studenti koji za ostvarivanje prava na stipendiju konkurišu kao studenti druge, treće, četvrte, pete ili šeste godine dodiplomskog studija, a koji su u prethodnoj akademskoj godini (za studente druge godine studija) ili u svim prethodnim akademskim godinama (za studente treće, četvrte, pete i šeste godine studija) ostvarili najmanju prosječnu ocjenu 9,0 uvrstavaju se na rang listu studenata, bez bodovanja kao prvorangirani po abecednom redu ukoliko ih ima više, uz napomenu da se na rang listu uvrstavaju kao studenti sa prosječnom ocjenom od 9,0.

Član 5.

Podnosioci prijava na Javni poziv koji se ne boduju (učenici generacije i studenti koji su postigli odličan uspjeh iz svih nastavnih predmeta) dužni su dostaviti sljedeću dokumentaciju:

1. **Prijavu** na Javni poziv za dodjelu stipendija u akademskoj 2023/2024. godini, popunjena i potpisana od strane studenta - (**Prilog br. 1.**),

2. **CIPS obrazac** – PBA 3 (MUP TK, Odjeljenje za administraciju Živinice) - original ili ovjerena kopija,
3. Uvjerenje/Potvrda da je **redovan** student dodiplomskog studija **akademske 2023/2024. godine** (obrazovna ustanova) - original ili ovjerena kopija,
4. Uvjerenje/Potvrda da je **prvi puta** upisao **akademsku 2023/24. godinu** (obrazovna ustanova) - original ili ovjerena kopija,
5. Izjava podnosioca prijave da nije primao stipendiju, kredit ili neku drugu novčanu naknadu za studij za **akademsku 2023/2024. godinu** - potpisana i ovjerena kod nadležne gradske službe ili notara - (**Prilog br. 2.**),
6. za kriterij **“učenik generacije”**:
 - Studenti prve godine studija prilažu Diplomom “Učenik generacije” (obrazovna ustanova) - ovjerena kopija,
7. za kriterij **„učenik koji je završio četverogodišnje srednje obrazovanje i postigao odličan uspjeh iz svih nastavnih predmeta”**:
 - Studenti prve godine studija prilažu „Diplomu za posebno postignute rezultate” ili svjedočanstva o završenim razredima srednje škole od I do IV razreda srednje škole (obrazovna ustanova) - ovjerena kopija,
8. za kriterij **„studenti druge, treće, četvrte, pete ili šeste godine dodiplomskog studija, koji su u prethodnoj akademskoj godini (za studente druge godine studija) ili u svim prethodnim akademskim godinama (za studente treće, četvrte, pete i šeste godine studija) ostvarili najmanju prosječnu ocjenu 9,0“**:
 - Studenti druge godine studija prilažu „Uvjerenje/Potvrdu o utvrđenom prosjeku ocjena za prvu godinu studija” (obrazovna ustanova) - ovjerena fotokopija,
 - Studenti treće godine studija prilažu „Uvjerenje/Potvrdu o utvrđenom prosjeku ocjena za prvu i drugu godinu studija” (obrazovna ustanova) - ovjerena fotokopija,
 - Studenti četvrte godine studija prilažu „Uvjerenje/Potvrdu o utvrđenom prosjeku ocjena za prvu, drugu i treću godinu studija” (obrazovna ustanova) - ovjerena fotokopija,
 - Studenti pete godine studija prilažu „Uvjerenje/Potvrdu o utvrđenom prosjeku ocjena za prvu, drugu, treću i četvrtu godinu studija” (obrazovna ustanova) - ovjerena fotokopija,
 - Studenti šeste godine studija prilažu „Uvjerenje/Potvrdu o utvrđenom prosjeku ocjena za prvu, drugu, treću, četvrtu i petu godinu studija” (obrazovna ustanova) - ovjerena fotokopija.

Podnosioci prijave na Javni poziv koji se boduju dužni su dostaviti sljedeću obaveznu dokumentaciju:

1. **Prijavu** na Javni poziv za dodjelu stipendija u akademskoj 2023/2024. godini, popunjena i potpisana od strane studenta - (**Prilog br. 1.**),
2. **CIPS obrazac** – PBA 3 (MUP TK, Odjeljenje za administraciju Živinice) - original ili ovjerena kopija,
3. Uvjerenje/Potvrda da je **redovan** student dodiplomskog studija **akademske 2023/2024. godine** (obrazovna ustanova) - original ili ovjerena kopija,
4. Uvjerenje/Potvrda da je **prvi puta** upisao **akademsku 2023/24. godinu** (obrazovna ustanova) - original ili ovjerena kopija,

5. Izjava podnosioca prijave da nije primao stipendiju, kredit ili neku drugu novčanu naknadu za studij za **akademska 2023/2024. godinu** - potpisana i ovjerena kod nadležne gradske službe ili notara - (**Prilog br. 2.**),
6. Izjava o visini dodatnih prihoda punoljetnih članova domaćinstava koji su navedeni na kućnoj listi, za čije dodatne prihode nije moguće obezbijediti pismene dokaze ovjerena kod nadležne gradske službe ili notara - (**Prilog br. 3.**).

Ukoliko podnosilac prijave (studenti koji se boduju) za dodjelu stipendije po kriterijima **“uspjeh u učenju”** i **“materijalni položaj”** ne dostavi potrebnu dokumentaciju tražnu Javnim pozivom kojom se dokazuje prosječna ocjena i prihodi po članu užeg domaćinstva, **takve prijave će se odbaciti kao nepotpune**, a za nedostavljanje dokumentacije po kriteriju **“socijalni položaj”** kojom se dokazuje pripadnost odgovarajućoj kategoriji stanovništva, podnosiocu prijave za dodjelu stipendije neće se dodjeljivati bodovi.

Član 6.

Za ispunjavanje uslova iz člana 4. Javnog poziva studenti koji se boduju prilažu:

1. za kriterij **“uspjeh u učenju”**:

- Studenti prve godine studija prilažu svjedočanstva o završenim razredima srednje škole od I do IV razreda (obrazovna ustanova) - ovjerene kopije,
- Studenti ostalih studijskih godina dodiplomskog studija prilažu uvjerenje sa utvrđenim prosjekom ocjena u predhodnoj završenoj **akademska godini (akademska 2022/2023)** (obrazovna ustanova) - original ili ovjerena kopija,

2. za kriterij **“materijalni položaj”**:

- **Kućna lista** kandidata na kojoj su navedeni svi članovi porodičnog domaćinstva popunjena i potpisana od strane roditelja/staratelja odnosno punoljetnog učenika (*Članom užeg prodičnog domaćinstva podrazumijeva se bračni partner, očuh, maćeha, usvojitelj, usvojenik, djeca, roditelji, braća i sestre ako sa studentom žive u zajedničkom domaćinstvu*) - nadležna gradska služba – original,
- **Uvjerenje o redovnom školovanju/studiranju** za sve članove porodičnog domaćinstva, navedene na kućnoj listi, koji se nalaze na redovnom školovanju/studiranju za školsku/akademska 2023/2024. godinu (ustanova visokog, srednjeg ili osnovnog obrazovanja) - original ili ovjerena kopija,
- **Dokaz o zaposlenju i visini stalnih prihoda** za sve punoljetne članove porodičnog domaćinstva (poslodavac kod kojeg je zaposlen, PIO/MIO, Porezna uprava FBiH) - original ili ovjerena kopija:
 - a) tri posljednje platne liste ovjerene potpisom i pečatom poslodavca ili uvjerenje poslodavca o visini posljednje tri mjesecne plate - original ili ovjerena kopija, ili
 - b) ček od PIO posljednje penzije – original ili ovjerena kopija, ili
 - c) za lica koja imaju registrovanu samostalnu djelatnost obrazac 2002 o plaćenim doprinosima za posljednja tri mjeseca - original ili ovjerena kopija, ili
 - d) za roditelje učenika koji tokom prijavljivanja na Javni poziv podnesu zahtjev za penzionisanje i time izgube status uposlenika dostavljaju zadnju platnu listu i potvrdu Zavoda PIO/MIO o predaji zahtjeva za penzionisanje – original ili ovjerena kopija, ili

e) za roditelje učenika koji tokom prijavljivanja na Javni poziv podnesu zahtjev za penzionisanje kao nezaposlene osobe dostavljaju dokaz o nezaposlenosti Službe za zapošljavanje i potvrdu Zavoda PIO/MIO o predaji zahtjeva za penzionisanje – original ili ovjerena kopija,

- **Uvjerenje Službe za zapošljavanje** za sve nezaposlene članove domaćinstva, a ukoliko se isti ne vode na evidenciji Službe za zapošljavanje, **uvjerenje iz ispostave porezne uprave** za sve nezaposlene članove domaćinstva kao dokaz o statusu nezaposlenosti (Služba za zapošljavanje ili Porezna uprava FBiH, Porezna ispostava Živinice) - original ili ovjerena kopija),

- **Dokaz o dodatnim prihodima** punoljetnih članova domaćinstva (prihodi po propisima o boračko-invalidskoj zaštiti, prihodi po propisima o zaštiti civilnih žrtava rata, stalna novčana pomoć, socijalna pomoć, naknada za njegu i pomoć drugog lica, prihodi od dopunske djelatnosti odnosno dopuskog rada, prihodi od izdavanja zemljišta, stambenog ili poslovnog prostora u zakup, prihodi po osnovu članstva u skupštini, upravnom ili nadzornom odboru ustanove ili preduzeća, te drugi dodatni prihodi, ugovori i slično) - pravni subjekti u kojima su angažovani punoljetni članovi domaćinstva, JU “Centar za socijalni rad” Živinice, nadležna gradska služba ili notar, original ili ovjerena kopija,

3. za kriterij “**socijalni položaj**”:

- za učenika člana porodice šehida ili poginulih boraca i ratnih vojnih invalida kopija prvostepenog ili revizionog rješenja - posljednje rješenje na snazi (Gradska služba za boračko -invalidsku zaštitu) - original ili ovjerena kopija,

- za demobilisane borce i dijete demobilisanog borca dokaz o pripadnosti branilačkoj populaciji koji izdaje nadležni organ odbrane (Federalno ministarstvo za pitanje boraca i invalida odbrambeno oslobodilačkog rata - Grupe za pitanja evidencije iz oblasti vojne obaveze - original ili ovjerena kopija,

Podnosioci prijave za dodjelu stipendija iz porodice branilaca, ostvaruju prioritet u stipendiranju na naprijed navedeni način, ukoliko je učenik član porodice branioca, koji je u sastavu oružanih snaga (Armija RBiH, Hrvatskog vijeća odbrane i policije nadležnog organa unutrašnjih poslova) proveo najmanje 12 mjeseci, u periodu od 18.09.1991.-22.04.1996. godine,

- za civilne žrtve rata ili djecu bez roditeljskog staranja dokaz o statusu civilne žrtve rata (JU “Centar za socijalni rad”) - original ili ovjerena kopija,

- za učenike sa invaliditetom i/ili učenike iz porodice osoba sa invaliditetom dokaz o invaliditetu (JU „Centar za socijalni rad”) – original ili ovjerena kopija.

Član 7.

Kod ostvarenog istog broja bodova na rang listi studenata prednost se ostvaruje po sljedećem redosljedju:

- student iz porodice šehida ili poginulog borca,
- student iz porodice RVI sa većim procentom invalidnosti,
- student iz porodice nazaposlenih demobilisanih boraca Armije BiH, HVO i MUP-a,
- student iz porodice zaposlenih demobilisanih boraca Armije BiH, HVO i MUP-a,
- student bez roditeljskog staranja,
- student dijete civilne žrtve rata,

- bolja prosječna ocjena izračunata po kriteriju “uspeh u učenju” zaokružena na dvije decimale,
- manji prihodi po članu užeg porodičnog domaćinstva zaokruženi na dvije decimale - materijalni položaj.

Član 8.

Gradonačelnik zadržava pravo da u svako vrijeme poništi Javni poziv, ako procjeni da za to postoje opravdani razlozi.

Član 9.

Javni poziv ostaje otvoren 15 dana od dana objavljivanja na Web stranici Grada Živinice.

Prijava na Javni poziv sa potrebnom dokumentacijom se podnosi u zatvorenoj koverti preporučeno putem pošte na adresu:

Grad Živinice, ul. “Alije Izetbegovića” br. 28 ili na pisarnicu Gradske uprave Živinice sa naznakom

“Prijava na Javni poziv za dodjelu stipendija studentima dodiplomskog studija za akademsku 2023/24. godinu”.

Obrazac prijave na Javni poziv, obrazac Izjave da student ne prima stipendiju, kredit ili neku drugu novčanu naknadu za studiranje od drugog davaoca i obrazac Izjave o visini dodatnih prihoda punoljetnih članova domaćinstva koji se navedeni na kućnoj listi može se preuzeti na Info pultu u Centru za pružanje usluga građanima /šalter sali ili na Web stranici Grada Živinice.

Studenti uz prijavu na Javni poziv dostavljaju i kopiju ličnog tekućeg računa na koji će se uplatiti finansijska sredstva, ukoliko budu dobitnici stipendija.

Svi dokumenti koji se prilažu na Javni poziv moraju biti originali ili ovjerene kopije.

Dostavljena dokumentacija po Javnom pozivu se neće vraćati.

Studenti su prilikom prijave na Javni poziv obavezni koristiti obrasce koji su navedeni u Javnom pozivu i iste svojeručno popuniti i potpisati ukoliko su punoljetni odnosno roditelj/staratelj za maloljetne podnosioc.

Neblagovremene prijave neće se uzeti u razmatranje.
Nepotpune i nepotpisane prijave biće odbačene.

Dostavljeno:

- 1.Oglasna tabla Grada Živinice,
- 2.Web stranica Grada Živinice,
- 3.a/a

GRADONAČELNIK

Dr. sci. Began Muhić